

INUIT ATAQATIGIIT

INATSISARTUNI



5. marts 2010
20. august 2009

UPA 2010/19
UKA 2009/35

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

Meeqqanik kinguaassiutitigut atonerluinermut pinngitsaaliillunilu atoqatiginninnernut atatillugu pineqaatissiisutit sukannerulerlunissaat aammalu pineqaatissinneqarsimasut pineqaatissinneqarnerminnut atatillugu katsorsarneqartalernissaat siunertaralugu Naalakkersuisut Qallunaat Nunaanni Naalakkersuisunik isumaqatigiinniarnermik aallartitsissasut Inatsisartunit peqquneqarnissaannik aalajangiiffigisassatut siunnersuut.
(Inatsisartunut ilaasortaqa Olga P. Berthelsen, Inuit Ataqatigiit)

Tunngavilersuutit:

Pineqaatissiinerit pinerluttaalisitsineq pillugu inatsit tunngavigalugu pinerlunnerup qanoq ittuunera tunngavigalugu pineqaatissiisoqartarpoq, kiisalu qanoq iliuuseqarluni pineqaatissinneqarsimasoq kingumut pinerluuteqannginnissaannik iliuuseqarfigineratigut.

Tamanna inuiaqatigiit kalaallit tunngaviusumik eqqarsartariaasiannut naleqquttutut isigineqarsinnaavoq. Pinerlunnerimmi assigiinngitsorpasuusarneri eqqarsaatigissagaanni, aammalu pinerliisut assigiinngitsorpasuusarneri eqqarsaatigissagaanni, taamatut periuseqarneq paasinarsinnaavoq.

Ukiut kingulliit arlalippasuit, nunatsinni meeqqanik inuusuttuaqqanillu kinguaassiutitigut kanngutsaatsuliortarnerit amerliartuinnarput, minnerunngitsumillu sakkortussutsimikkut annertusiartuinnarlutik.

Pinerlunnerit qanoq ittuuneri aammalu inuiaqatigiinni pinaveersimatitsiniarnermik suliniuteqarnermik pingaartitsineq eqqarsaatigalugu, Inuit Ataqatigiinniit isumaqarpugut, kinguaassiutitigut kanngutsaatsuliortarnerit akiorniarneqarnissaannut sakkunik nutaanik eqqarsartariaqalersugut.

Kinguaassiutitigut innarliisartut katsorsarneqartannginnertik peqqutigalugu innarliisarnerat pillaanerinnaq atorlugu qaangerneqarsinnaangillat. Taamaattumik inuiaqatigiinni – ilumut tamanna pingaartikkutsigu – kinguaassiutitigut innarliisartut katsorsarneqartarnissaat pingaartittariaqarparput.

Ilisimaneqarpoq kinguaassiutitigut innarlerneqarsimasut, tarnikkut nanertugaanertik peqqutigalugu namminneerlutik innarliisartunngorsinnaanerit qanittuararsuusartoq. Siunissaq ungasinnerusoq eqqarsaatigalugu pinaveersaartitsinerlu iluatsissappat, nunatsinni naalakkersuinikkut qanoq iliuuseqartoqarnissaa pisariaqarluninnoq.

Pinerluttaalisitsineq pillugu inatsit, Qallunaat Nunaata ataaniippoq. Nunatsinni naalakkersuinermik suliallit toqqaannartumik inatsit taanna allannortissinnaanngilaat.

Taamaattumik nunatsinni Naalakkersuisut ajornartorsiummut eqqartorneqartumut pinaveersaartitsiniarneq aammalu innarliisimasunik katsorsaasarneq angorusukkunikku Qallunaat Nunaanni Naalakkersuisunut saaffiginnittariaqarput.

Inuit Ataqtigiinniit ilisimavarput nunatsinni partiit tamarmik ajornartorsiutip tamatumap qaangerniarneqarnissaanut suleqataallutillu peqataarusunnermik oqariatuuteqartartut.

Taamaattumik neriuteqarpugut siunissami nunatsinni inuit toqqissisimasumik innarlerneqarsimannigsumillu inuulernissaannut aqutissat ilaat pingaaruteqartoq tapersorsorumaaraat. Taamaattoqanngippammi sulii ukiorpassuit ajornartorsiut taammatut ittoq nunatsinni atugaajuassammat.